

## **CONVENIO DE COLABORACIÓN ENTRE A CONSELLERÍA DE EMPREGO, COMERCIO E EMIGRACIÓN E A FEDERACIÓN GALEGA DE ASOCIACIÓNS E GREMIOS DE XOIEIROS, PRATEIROS E RELOXEIROS PARA A REALIZACIÓN DE DIVERSAS ACTUACIÓNS DE REVITALIZACIÓN COMERCIAL E DE INCENTIVACIÓN DO CONSUMO**

En Santiago de Compostela, na data da sinatura dixital

### **REUNIDOS**

Dunha parte, José González Vázquez, conselleiro de Emprego, Comercio e Emigración da Xunta de Galicia, nomeado para o devandito cargo polo Decreto 44/2024, do 14 de abril, actuando en exercicio das competencias que ten atribuídas polo artigo 34 da Lei 1/1983, de 22 de febreiro, de normas reguladoras da Xunta de Galicia e da súa Presidencia.

Doutra parte, Óscar Rodríguez Blanco, con DNI 76563232G, actuando en nome e representación da Federación galega de asociacións e gremios de xoieiros, prateiros e reloxeiros, na súa calidade de presidente en virtude das facultadas emanadas nos seus Estatutos.

Os comparecentes, na representación que ostentan, teñen a capacidade legal suficiente para o outorgamento deste convenio de colaboración, na súa virtude,

### **EXPOÑEN**

**PRIMEIRO.** A Consellería de Emprego, Comercio e Emigración, en adiante, a consellería, é o órgano encargado de exercer as competencias que, en materia de comercio interior, o artigo 30.I.4 do Estatuto de autonomía de Galicia atribúe á nosa comunidade autónoma segundo o Decreto 42/2024, do 14 de abril, polo que se establece a estrutura orgánica da Xunta de Galicia e o Decreto 49/2024, de 22 de abril, polo que se fixa a estrutura orgánica das consellerías da Xunta de Galicia.

O Decreto 147/2024, do 20 de maio, polo que se establece a estrutura orgánica da Consellería de Emprego, Comercio e Emigración establece que lle corresponde á Dirección Xeral de Comercio e Consumo a planificación, a coordinación e o control das competencias da consellería en materia de comercio interior. Concretamente, o programa 751A, que xestiona a Dirección Xeral de Comercio e Consumo, contempla entre os seus obxectivos, a renovación e a promoción do sector comercial retalista, neste caso apoiando as actuacións desenvolvidas pola Federación Galega de Asociacións e Gremios de Xoieiros, Prateiros e Reloxeiros para acadar o nivel de concorrencia desexable cara o mercado interior e que incida no seu maior desenvolvemento.

A situación do pequeno comercio polo miúdo no noso país, sendo un dos principais motores da nosa economía, incide de forma importante no desenvolvemento económico e social global, así como na mellora do estado de benestar e das condicións de vida de todos os cidadáns.

O comercio tradicional está sometido a un profundo proceso de cambio que esixe realizar un esforzo de renovación e adaptación continuo.

É importante que todas as administracións públicas colaboren coas entidades representativas do sector e contribúan con todos os recursos necesarios á mellora e desenvolvemento do sector comercial para acadar a súa plena concorrencia nun mercado cada vez máis difícil. Deste xeito, o comercio poderá afrontar os retos e superar os obstáculos que se lle presenten habitualmente e que dificultan a súa continuidade, mantendo a súa posición como motores das economías locais e rexionais e do papel xerador de emprego de calidade no sector terciario.

Durante os últimos anos, as pequenas empresas comerciais de proximidade estanse enfrontando a unha serie de desafíos que ameazan a súa concorrencia. Os cambios nos hábitos das persoas consumidoras, impulsados polo auxe do comercio en liña e a preferencia por experiencias de compra máis rápidas e a necesaria adaptación ás novas tecnoloxías e estratexias de mercadotecnia requiren medidas de apoio, tanto a nivel governamental como comunitario, para garantir a súa supervivencia a longo prazo.

Actualmente, os comercios afrontan ademais outro grave problema derivado da crise internacional co aumento dos prezos dos combustibles que lles afecta indirectamente polos problemas de abastecemento de mercadorías, o que provoca unha escaseza no noso pequeno comercio, así como un incremento do custo das mercadorías a venda.

Por isto, é preciso manter unha serie de medidas para asesorar, informar, formar e impulsar a dixitalización e reforzar a dinamización e cualificación do sector para evitar unha perda de concorrencia. Nas crises que se veñen repetindo manifestase como a dixitalización e o uso das novas tecnoloxías se configuran como ferramentas de utilidade para manter a actividade do comercio, polo que resulta preciso a posta en marcha de mecanismos de xestión integral que permitan combinar a venda física coa venda en liña e a distancia.

Ademais, a suspensión ou limitación para exercer con normalidade as actividades económicas durante as crises que se veñen encadeando esixen a programación desas liñas de dinamización e cualificación que incentiven a demanda e procuren a visualización do comercio de proximidade e que potencie a súa actividade.

No orzamento de gastos para o exercicio 2025 inclúese a aplicación 14.06.751A.781.1 "Asociacionismo comercial e servizos para pemes comerciais", coa fonte de financiamento de fondos propios libres (1010) e proxecto de investimento número 2015.00254 "Modernización, emprendemento e innovación do comercio e das pemes comerciais". De conformidade co disposto polos artigos 19.4 e 26 da Lei de 9/2007, do 13 de xuño, de subvencións de Galicia,

trátase dunha subvención de concesión directa que se instrumenta a través deste convenio de colaboración.

Os gastos das campañas obxecto deste convenio son gastos de investimento de carácter inmaterial, que se ben se van realizar neste exercicio, son susceptibles de producir efectos en exercicios futuros, de xeito que a promoción e a publicidade que se faga nun exercicio vai repercutir nas actuacións que se repitan no exercicio seguinte. Neste sentido pódense considerar investimentos a futuro, o que redundaría nun beneficio económico a longo prazo para a comunidade autónoma e para o sector do comercio galego.

**SEGUNDO.** A Federación galega de asociacións e gremios de xoieiros, prateiros e reloxeiros, no sucesivo, a federación, ten como obxecto fundamental representar, coordinar e defender os intereses do sector da xoiaría, prataría e relojaría en Galicia, entre os que destaca a competitividade das empresa do sector comercial.

Os establecementos de comercio retalista de xoiaría en Galicia teñen en común a reducida dimensión e capacidade económica, a dispersión xeográfica, a diversidade de produtos (relojaría, prataría, ourivaría, etc. de diversas marcas) e un amplo abano de público. Isto constitúe unha dificultade á hora de acometer accións de promoción ou de vendas de forma conxunta, xa que estas deben ir dirixidas a todo tipo de consumidores e dar resposta ás necesidades de todo tipo de establecementos (urbanos ou rurais), mediante unha promoción xenérica da xoiaría, sen distinción de marcas.

A dinamización do pequeno comercio de xoiaría tamén leva consigo o impulso da actividade industrial do sector, contribuíndo así a preservar un gremio que destaca pola súa creatividade e proxección da cultura e imaxe de Galicia.

As actuacións da federación durante o ano 2025 teñen como principais obxectivos os de promocionar ás xoiarías galegas, facéndoas máis visibles fronte a outras alternativas de consumo a través das grandes plataformas físicas e online, incrementar a competitividade do sector e a economía local, dinamizar o comercio de xoiaría e, en especial, a ourivería artesanal, símbolo de Galicia e da súa cultura, axudar ao comercio para adaptarse ás novas tendencias e dar publicidade a imaxe da xoiaría en datas clave para o consumo ao longo do ano.

Por isto, considérase que as súas actuacións enmárcanse no interese xeral e de acordo co disposto no artigo 26.2 a) da Lei de subvencións de Galicia, non é posible promover a concorrencia competitiva porque as actuacións obxecto deste convenio realizaranse pola federación que é a única que pode alcanzar a toda a Comunidade Autónoma no sector da xoiaría, pratería e relojería e desenvolver as actividades de fomento deseñadas e executadas singularmente por ela mesma.

En consecuencia, existen razóns de interese público, social e económico que xustifican, conforme ao artigo 19.4.c) e 26.2.a) da Lei 9/2007, de 13 de xuño, a colaboración da Xunta de

Galicia, a través da Consellería de Emprego, Comercio e Emigración, no financiamento deste convenio para a concesión dunha subvención directa de carácter singular á Federación galega de asociacións e gremios de xoieiros, prateiros e reloxeiros.

**TERCEIRO.** Con carácter previo á sinatura deste convenio, a federación acreditou a concorrencia ou non doutras axudas públicas para a mesma finalidade, de conformidade co establecido no artigo 11.d) da Lei de subvencións de Galicia. Así mesmo, constan certificacións de estar ao corrente nas súas obrigas tributarias, coa Seguridade Social e de non ter débedas pendentes por ningún concepto coa Xunta de Galicia, de acordo co establecido nos artigos 11.e) e 31.7 da devandita lei.

A teor do exposto, a confluencia de obxectivos das partes aconsella a coordinación das súas actuacións polo que, en virtude das competencias que ambas teñen atribuídas, acordan subscribir o presente convenio de colaboración de conformidade coas seguintes

## CLÁUSULAS

### **PRIMEIRA.- Obxecto**

Este convenio ten por obxecto establecer as bases de colaboración entre a consellería e a federación para a realización de diversas actuacións de revitalización comercial e de incentivación do consumo.

### **SEGUNDA.- Orzamento e financiamento**

O orzamento total ascende a cincuenta e cinco mil douscentos corenta e seis euros con vinte e seis céntimos (55.246,26 €), IVE engadido.

A consellería achegará a cantidade de corenta mil euros (40.000,00 €), IVE engadido, con cargo á aplicación orzamentaria 14.06.751A.781.1 "Asociacionismo comercial e servizos para pemes comerciais" do orzamento de gastos para o ano 2025, coa fonte de financiamento de fondos propios libres (1010) e proxecto de investimento número 2015.00254 "Modernización, emprendemento e innovación do comercio e das pemes comerciais".

A federación financiará o resto do orzamento na cantidade de quince mil douscentos corenta e seis euros con vinte e seis céntimos (15.246,26 €), IVE engadido.

Na execución deste convenio realizaranse as seguintes actuacións de promoción comercial que constitúen gastos de investimento de carácter inmaterial (campañas publicitarias de orientación do consumo, campañas de promoción, feiras, exposicións etc..) coa desagregación que figura no anexo:

Actuación	Importe
Campaña de Reis	6.809,96 €
Campaña de San Valentín	4.598,00 €
Campaña Día da Nai	21.271,80 €

Campaña orientada aos eventos de verán	8.869,30 €
Campaña de Nadal	13.697,20 €
<b>TOTAL</b>	<b>55.246,26 €</b>

Calquera contracción do gasto que se orixine como consecuencia deste convenio deberá contar coa fiscalización previa da consellería e, por tanto, estará sometida á existencia de crédito orzamentario adecuado e suficiente.

#### **TERCEIRA.- *Gastos subvencionables***

Consideraranse actuacións subvencionables os investimentos e gastos necesarios para desenvolvemento do obxecto do convenio.

De acordo co previsto no artigo 29.1 da Lei 9/2007, do 13 de xuño consideraranse subvencionables os gastos e investimentos que, sen admitir dúbida, respondan á natureza da actividade subvencionada e se realicen no período comprendido entre o 1 de xaneiro e o 1 de decembro de 2025.

O custo de adquisición dos gastos subvencionables non poderá ser superior, en ningún caso, ao valor de mercado.

#### **CUARTA.- *Obrigas da consellería***

A consellería comprométese a librar as achegas que correspondan unha vez que a federación presente a correspondente documentación xustificativa e sexa aprobada polos órganos competentes da consellería.

#### **QUINTA.- *Obrigas da federación***

A federación, para poder obter a condición de beneficiario neste convenio, deberá cumprir as seguintes obrigas:

- Presentar declaración responsable de non estar incurso en ningunha das circunstancias previstas do artigo 10 da Lei 9/2007, do 13 de xuño.

En todo caso, quedará suxeito ao cumprimento das obrigas impostas polo artigo 11 da Lei 9/2007, do 13 de xuño, así como ás demais que resulten concordantes á vista do réxime xurídico aplicable ás subvencións públicas; e, en especial, ás seguintes:

- Xestionar e executar os investimentos sinalados neste convenio que fundamentan a concesión da subvención.

- Xustificar ante a consellería, no tempo e forma que correspondan, o cumprimento dos requisitos e condicións que determinan a concesión da subvención, así como a realización das actividades e o cumprimento da finalidade das mesmas.

- Someterse ás actuacións de comprobación da consellería, así como a calquera outra comprobación e control financeiro que poidan realizar os órganos de control competentes, e achegar canta información lle sexa requirida no exercicio das actuacións anteriores. En particular, facilitar toda a información que lle sexa requirida pola Intervención Xeral da Comunidade Autónoma, o Tribunal de Contas e o Consello de Contas no exercicio das súas funcións de fiscalización e control.
- Conservar os documentos xustificativos da aplicación dos fondos recibidos incluídos os documentos electrónicos en tanto poidan ser obxecto das actuacións de comprobación e control.
- Reintegrar, total ou parcialmente, a subvención percibida no suposto de incumprimento das condicións establecidas para a súa concesión.
- Comunicar por escrito á consellería a obtención doutras subvencións, axudas, ingresos ou recursos que financien as actividades subvencionadas. Esta comunicación deberá efectuarse tan pronto se coñeza a dita obtención e, en todo caso, con anterioridade á xustificación da aplicación dada aos fondos percibidos en virtude do presente convenio.
- Comunicar á consellería o xurdimento ou a modificación de calquera circunstancia que afecte a algún dos requisitos esixidos para a concesión da subvención.
- Dar a adecuada publicidade do carácter público do financiamento pola Xunta de Galicia en todas as actuacións que deriven da execución deste convenio, empregando os soportes mais adecuados á natureza dos investimentos en cumprimento do artigo 15.3º da Lei 9/2007, do 13 de xuño.
- Subministrar á Consellería de Emprego, Comercio e Emigración, en virtude do disposto no artigo 4.3 da Lei 1/2016, do 18 de xaneiro, de transparencia e bo goberno, previo requirimento, toda a información necesaria para o cumprimento das obrigas previstas no Título I da dita lei por parte da Consellería de Emprego, Comercio e Emigración.

#### **SEXTA.- Subcontratación**

Permitirase a subcontratación do 100 % das actividades subvencionadas, agás que o impida a natureza das mesmas. A subcontratación regularase polo disposto no artigo 27 da Lei 9/2007 e no artigo 43 do Decreto 11/2009, do 8 de xaneiro, polo que se aproba o Regulamento da devandita lei.

As persoas contratistas quedarán obrigadas soamente ante o beneficiario, que asumirá a total responsabilidade da execución do proxecto subvencionado fronte á Administración autonómica.

En ningún caso poderán subcontratarse actividades que non aporten valor engadido ao seu contido.

### **SÉTIMA.- *Relación con terceiros***

A subscripción deste convenio non comporta relación laboral, contractual ou de calquera outro tipo entre os profesionais que desenvolvan as actividades e a consellería, de tal xeito que non se lle poderá esixir responsabilidade ningunha, nin directa, nin indirecta, nin subsidiaria, polos actos ou feitos acaecidos no seu desenvolvemento.

### **OITAVA.- *Xustificación e pagamento***

A data límite para xustificar o investimento será o día 5 de decembro de 2025.

O libramento da achega pola consellería levarase a cabo unha vez que a federación achegue á Dirección Xeral de Comercio e Consumo a xustificación da realización dos obxectivos e fitos alcanzados, que incluírá a seguinte documentación:

- a) Memoria xustificativa do cumprimento das obrigas establecidas no convenio, con indicación das actividades realizadas, os resultados obtidos.
- b) Relación certificada de gastos, acompañada da relación nominativa das facturas ou medios de xustificación equivalentes agrupadas por cada unha das actuacións desenvolvidas.

As facturas e documentos xustificativos dos gastos deberán achegarse acompañados dos xustificantes de pagamento de acordo co que dispón o artigo 28 da Lei 9/2007, do 13 de xuño, agás daqueles gastos, de tracto periódico e iterativo, tales como o pago de impostos ou de cotizacións de traballadores que non é posible xustificar dentro do período estipulado neste convenio pero dos que se presentan nóminas ou copia das liquidacións, no seu caso. A federación deberá presentar unha xustificación complementaria no mes de xaneiro ou febreiro, cando o pago sexa efectivo, para completar o expediente.

A elección entre as ofertas presentadas, que deberán achegarse na xustificación ou, se é o caso, na solicitude da subvención, realizarase de conformidade con criterios de eficiencia e economía, e deberá xustificarse expresamente nunha memoria a elección cando no recaia na proposta económica máis vantaxosa.

- c) Certificación da entidade da concorrencia ou non doutras axudas públicas para a mesma finalidade, de conformidade co disposto no artigo 11.d) da Lei de subvencións de Galicia.
- d) Certificacións de estar ao corrente a entidade nas súas obrigas tributarias e coa Seguridade Social e de non ter débedas pendentes por ningún concepto coa Xunta de Galicia.

A achega da consellería minorarase en porcentaxe no caso de que a federación non xustifique o orzamento total que figura neste convenio.

Por outra banda, a federación queda obrigada a facilitar toda a información que lle sexa requirida pola Intervención Xeral da Comunidade Autónoma, o Tribunal de Contas e o

Consello de Contas no exercicio das súas funcións de fiscalización e control.

Así mesmo, deberá dar a adecuada publicidade do carácter público do financiamento en todas as actuacións que se deriven da execución do presente convenio, adoptando as medidas de difusión contidas no punto 3 do artigo 15 da Lei 9/2007, do 13 de xuño, e deberá incluír en cada comunicación ou actuación relativa as actuacións previstas neste convenio o logo da Xunta de Galicia.

#### **NOVENA.- *Compatibilidade das axudas***

A axuda concedida ao abeiro deste convenio será compatible con outras axudas outorgadas por outras administracións ou entes públicos ou privados, nacionais ou internacionais, para a mesma finalidade sempre que o importe total das subvencións concedidas non supere o custo das actividades subvencionadas.

#### **DÉCIMA.- *Perda do dereito ao cobro e reintegro***

Producirase a perda do dereito ao cobramento total ou parcial da subvención no suposto de falla de xustificación do cumprimento do convenio ou incumprimento.

Incumprimento parcial:

Aínda que se cumpran os requisitos ou condicións esenciais reflectidos no convenio, a Dirección Xeral de Comercio e Consumo poderá apreciar un incumprimento parcial e deberá resolver sobre o seu alcance, aplicando a mesma ponderación que tivese a condición incumplida no convenio e, se e o caso, establecendo a obriga de reintegro. Cando se trate de condicións referentes á contía ou conceptos do investimento subvencionable, o alcance do incumprimento determinarase proporcionalmente ao gasto deixado de practicar ou aplicado a conceptos distintos dos considerados subvencionables e, se é o caso, deberán reintegrarse as cantidades percibidas na dita proporción.

Con carácter xeral, se o incumprimento superase o 65% do investimento subvencionable, entenderase que o dito incumprimento é total e deberán reintegrarse todas as cantidades percibidas e os seus xuros de demora correspondentes.

Incumprimento total:

O procedemento para declarar a procedencia da perda do dereito de cobramento da subvención e para facer efectiva a devolución á que se refire o parágrafo anterior será o establecido no Título II da Lei 9/2007, do 13 de xuño.

Á federación, como beneficiaria da subvención regulada neste convenio, seralle de aplicación o réxime de infraccións e sancións previsto no Título IV da Lei 9/2007, do 13 de xuño e no Título VI do seu regulamento.

#### **DÉCIMO PRIMEIRA.- *Modificación***

Toda alteración das condicións a ter en conta para a concesión da axuda poderá dar lugar á modificación do convenio nos termos previstos no artigo 35 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño.

As devanditas modificacións deberán formalizarse a través da correspondente adenda e someterse aos requisitos previstos no artigo 35 do Decreto 11/2009, do 8 de xaneiro.

Así mesmo, de conformidade co establecido no artigo 31.4 da Lei 14/2013, do 26 de decembro, de racionalización do sector público autonómico, o convenio poderá ser modificado unilateralmente pola Administración cando teña por finalidade o logro dos obxectivos de estabilidade orzamentaria e sustentabilidade financeira.

#### **DÉCIMO SEGUNDA.- Resolución**

Serán causas de resolución do convenio as seguintes:

- O transcurso do prazo de vixencia.
- O acordo unánime das partes asinantes.
- O incumprimento das obrigacións e compromisos asumidos por parte dalgún dos asinantes.
- A decisión xudicial declaratoria da nulidade do convenio.
- Calquera outra causa distinta das anteriores prevista no convenio ou na lexislación de aplicación.

#### **DÉCIMO TERCEIRA.- Publicidade e inscrición no Rexistro de convenios**

O convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, e no Decreto 126/2006, do 20 de xullo, polo que se regula o Rexistro de Convenios da Xunta de Galicia.

A sinatura deste convenio suporá o consentimento expreso das partes asinantes para incluír e facer públicos os datos persoais que consten no convenio, e o resto de especificacións contidas nel, de conformidade co disposto no antedito artigo 15 da Lei 1/2016, do 18 de xaneiro e no Decreto 126/2006, do 20 de xullo.

En cumprimento do disposto nos artigos 18, 20.2 e 20.8 da Lei 38/2003, do 17 de novembro, xeral de subvencións, comunicarse a subscripción deste convenio á Base de Datos Nacional de Subvencións que opera como sistema nacional de publicidade de subvencións.

#### **DÉCIMO CUARTA.- Protección de datos de carácter persoal**

Na execución deste convenio respectarase a normativa vixente en materia de protección de datos. As partes comprométense a cumprir o establecido no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE, e na Lei orgánica 3/2018, do 5 de decembro, de protección de datos persoais e garantía dos dereitos dixitais.

Así mesmo as partes comprométense a adoptar as medidas de carácter técnico e organizativo precisas que garantan a seguridade dos datos de carácter persoal e eviten a súa alteración, perda de tratamento e acceso non autorizado, tendo en conta o estado da tecnoloxía, a natureza dos datos almacenados e os riscos aos que están expostos, proveñan da acción humana o do medio físico ou natural.

#### **DÉCIMO QUINTA.- *Comisión de seguimento***

Coa finalidade de asegurar o cumprimento deste convenio, constituirase unha comisión paritaria de seguimento que adoptará os seus acordos por consenso e estará integrada por dúas persoas representantes da consellería e dúas en representación da federación.

A comisión constituirase a petición de calquera das partes e as súas funcións serán velar polo cumprimento do convenio e propoñer as medidas necesarias para garantir o exercicio coordinado das competencias de cada unha das partes.

En todo o non especificamente previsto sobre o funcionamento desta comisión serán de aplicación as normas sobre órganos colexiados previstas na Lei 40/2015, do 1 de outubro, de réxime xurídico do sector público e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia. A propia comisión, unha vez constituída, decidirá o réxime das súas reunións.

#### **DÉCIMO SEXTA.- *Vixencia***

O convenio entrará en vigor na data da súa sinatura e estenderá a súa vixencia ata o 31 de decembro de 2025, sen que se prevexa a posibilidade de prórroga do mesmo.

Non obstante quedan incluídas todas as accións desenvolvidas dende o 1 de xaneiro de 2025, sempre que se correspondan co obxecto deste convenio.

#### **DÉCIMO SÉTIMA.- *Natureza xurídica, réxime xurídico e xurisdición competente***

Este convenio ten natureza administrativa e considérase incluído no artigo 4 da Lei 9/2017, do 8 de novembro, de contratos do sector público, polo que queda fóra do seu ámbito de aplicación, se ben se aplicarán os principios e criterios do dito texto legal para resolver as dúbidas e lagoas que puideran presentarse.

O convenio rexerase polas súas propias cláusulas e, ademais, polos preceptos básicos da Lei 38/2003, de 17 de novembro, xeral de subvencións, polo Real Decreto 887/2006, de 21 de xullo que a desenvolve, pola Lei 9/2007, do 13 de xuño, de subvencións de Galicia, o Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, o Decreto legislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia, Lei 1/2016, de 18 de xaneiro, de transparencia e bo goberno, Lei 39/2015, de 1 de outubro, do procedemento administrativo común das administracións públicas e Lei 40/2015 do 1 de outubro, de réxime xurídico do sector público.

Así mesmo, seranlle de aplicación as demais normas de dereito administrativo aplicable ou, no seu defecto, as derivadas do dereito privado.

En consecuencia, correspóndenlle á consellería as prerrogativas de interpretación, modificación, resolución, reintegro e nulidade deste convenio, así como resolver as dúbidas que xurdan sobre o seu cumprimento. Os acordos correspondentes porán fin á vía

administrativa e serán inmediatamente executivos, sendo impugnables ante a xurisdición contencioso-administrativa.

Este convenio obriga ao cumprimento do expresamente pactado, someténdose as partes ao acordado en todas as súas estipulacións. E, en proba de conformidade, subscríbese este convenio no lugar e data enriba sinalados, por duplicado exemplar e para un único efecto.

Pola Xunta de Galicia  
O conselleiro de Emprego, Comercio e  
Emigración

Pola Federación galega de asociacións e  
gremios de xoieiros, prateiros e reloxeiros  
O presidente

José González Vázquez

Óscar Rodríguez Blanco

**ANEXO**

<b>CAMPAÑA DE REIS</b>	
<b>ACTUACIÓNS</b>	<b>ORZAMENTO</b>
1. Deseño dun landing page con IA para a produción das mensaxesmaxicas.com. 2. Promoción da campaña en RRSS e radio.	6.809,96 €
<b>CAMPAÑA DE SAN VALENTÍN</b>	
<b>ACTUACIÓNS</b>	<b>ORZAMENTO</b>
1. Desenvolvemento do "Concurso do amor". Realización de enquisas nas rúas, fotografías, grabación de vídeos e edición das mesmas para xerar contidos dixitais. 2. Xestión da campaña en prensa e RRSS.	4.598,00 €
<b>CAMPAÑA DÍA DA NAI</b>	
<b>ACTUACIÓNS</b>	<b>ORZAMENTO</b>
1. Organización do acto promocional de entrega de premios do certame "Deseña unha xoia para a túa nai": confección e distribución de 12.000 dípticos e adhesivos dos establecementos participantes no certame, servizos audiovisuais, decoración do auditorio, seguro de responsabilidade civil, azafatas, diplomas, material promocional, organización e posta en escena. 2. Difusión en prensa escrita, radio e RRSS.	21.271,80 €
<b>CAMPAÑA ORIENTADA AOS EVENTOS DE VERÁN</b>	
<b>ACTUACIÓNS</b>	<b>ORZAMENTO</b>
1. Campaña publicitaria da venda de xoiaría nos eventos de verán (vodas, bautizos, comuñóns, ou graduacións, entre outros). 2. Difusión a través da radio e RRSS.	8.869,30 €
<b>CAMPAÑA DE NADAL</b>	
<b>ACTUACIÓNS</b>	<b>ORZAMENTO</b>
1. Campaña publicitaria en prensa escrita e radio para incentivar o consumo da xoiaría na tempada de Nadal.	13.697,20 €
<b>TOTAL</b>	<b>55. 246,26 €</b>

